



აკაკი წერეთლის სახელმწიფო
უნივერსიტეტის აკადემიური საბჭო

ACADEMIC BOARD OF AKAKI
TSERETELI STATE UNIVERSITY

თამარ მეფის ქ. № 59
მის: 4600, საქართველო, ქუთაისი

ტელ: (+995 331) 4 21 73 ფაქსი (+995 331) 4 38 33
ელ.ფოსტა atsu@atsu.edu.ge

აკაკი წერეთლის სახელმწიფო უნივერსიტეტი
აკადემიური საბჭო

30 ნოემბერი, 2012

დადგენილება № 5 (12/13)

**ა(ა) ი ბ– აკაკი წერეთლის სახელმწიფო უნივერსიტეტის საარჩევნო კოდექსის დამტკიცების
თაობაზე**

ა(ა)იბ აკაკი წერეთლის სახელმწიფო უნივერსიტეტის წესდების დამტკიცების შესახებ“
საქართველოს განათლებისა და მეცნიერების მინისტრის 2011 წლის 28 დეკემბრის N 217/5
ბრძანების 29-ე მუხლის შესაბამისად, უნივერსიტეტის აკადემიური საბჭო ადგენს:

1. დამტკიცდეს ა(ა)იბ - აკაკი წერეთლის სახელმწიფო უნივერსიტეტის საარჩევნო კოდექსი.
2. დადგენილება გამოქვეყნდეს უნივერსიტეტის ბეჭდვით ორგანოში, განთავსდეს უნივერსიტეტის ვებ-გვერდსა და გამოიკრას უნივერსიტეტის საინფორმაციო დაფაზე.
3. დადგენილება ძალაში შევიდეს 30 ნოემბრიდან.
4. ძალადაკარგულად ჩაითვალოს აწსუ წარმომადგენლობითი საბჭოს №36 (30.09.2010) და №40 (10.12.2010) დადგენილებები.

აკადემიური საბჭოს
თავმჯდომარე, რექტორი:

პროფ. გიორგი ღვთაძე

დამტკიცებულია აკაკი წერეთლის სახელმწიფო
უნივერსიტეტის აკადემიური საბჭოს
2012 წლის 30 ნოემბრის სხდომის N5(12/13) დადგენილებით

ა(ა)იპ - აკაკი წერეთლის სახელმწიფო უნივერსიტეტის

საარჩევნო კოდექსი

თავი I. ზოგადი დებულებები

მუხლი 1. ა(ა)იპ აკაკი წერეთლის სახელმწიფო უნივერსიტეტის (შემდგომში – უნივერსიტეტი) საარჩევნო კოდექსი შემუშავებულია „უმაღლესი განათლების შესახებ“ საქართველოს კანონის, „ა(ა)იპ აკაკი წერეთლის სახელმწიფო უნივერსიტეტის წესდების დამტკიცების შესახებ“ საქართველოს განათლებისა და მეცნიერების მინისტრის 2011 წლის 28 დეკემბრის N217/ნ ბრძანებით დამტკიცებული უნივერსიტეტის წესდების (შემდგომში – უნივერსიტეტის წესდება) და სხვა აქტების შესაბამისად.

მუხლი 2. კოდექსი განსაზღვრავს უნივერსიტეტის მართვის ორგანოების არჩევის წესს, საარჩევნო კომისიების უფლებამოსილებებს, კომპენტენციას, არჩევნების მომზადებისა და ჩატარების სამართლებრივ საფუძვლებს, არჩევნებში მონაწილეთა უფლებებისა და გარანტიებს, დავის განხილვის წესს და აწესრიგებს უნივერსიტეტის მართვის ორგანოების არჩევნებთან დაკავშირებულ სხვა ურთიერთობებს.

მუხლი 3. კოდექსს ამტკიცებს აკადემიური საბჭო.

მუხლი 4. ამ კოდექსის ან მისი ნაწილის ბათილად ან ძალადაკარგულად ცნობა, დებულებაში ცვლილებების და/ან დამატებების შეტანა ხდება უნივერსიტეტის აკადემიური საბჭოს მიერ.

მუხლი 5. უნივერსიტეტის მართვის ორგანოების არჩევნებთან დაკავშირებული საკითხები, რომლებიც მოწესრიგებული არ არის ამ კოდექსით, რეგულირდება უნივერსიტეტის რექტორის ადმინისტრაციული აქტით. რექტორის გადაწყვეტილებები არ უნდა ეწინააღმდეგებოდეს ამ კოდექსს, უნივერსიტეტის წესდებას და მოქმედ კანონმდებლობას.

თავი II. არჩევნების ძირითადი პრინციპები.

მუხლი 6. წარმომადგენლობითი საბჭოს არჩევა ხდება საყოველთაო, პირდაპირი, თანასწორი არჩევნების საფუძველზე ფარული კენჭისყრით.

მუხლი 7. აკადემიური საბჭოს არჩევა ხდება პირდაპირი, თანასწორი არჩევნების საფუძველზე ფარული კენჭისყრით.

მუხლი 8. უნივერსიტეტის რექტორის, ადმინისტრაციის ხელმძღვანელისა და ხარისხის უზრუნველყოფის სამსახურის უფროსის არჩევნები ტარდება „უმაღლესი განათლების შესახებ“ საქართველოს კანონის, უნივერსიტეტის წესდების და ამ კოდექსის შესაბამისად.

მუხლი 9. საარჩევნო პროცესი, საარჩევნო კომისიების საქმიანობა, არჩევნებისათვის გაწეული ხარჯები ღია და საჯაროა.

მუხლი 10. დაუშვებელია ისეთი ადმინისტრაციული აქტის მიღება, რომელიც ზღუდავს არჩევნებში მონაწილე კანდიდატთა და ამომრჩევლის ნების თავისუფალ გამოვლინებას ან არღვევს არჩევნების მონაწილეთა თანასწორობას.

მუხლი 11. უნივერსიტეტის მართვის ორგანოების არჩევნებზე დასწრების უფლება აქვს ნებისმიერ პირს ამ კოდექსით დადგენილი წესის შესაბამისად.

თავი III. არჩევნების გამოცხადების წესი

მუხლი 12. არჩევნების გამოცხადება.

1. უნივერსიტეტის მართვის ორგანოების – აკადემიური და წარმომადგენლობითი საბჭოების არჩევნებს ნიშნავს უნივერსიტეტის რექტორი.
2. რექტორის ადმინისტრაციული აქტი არჩევნების დანიშვნის თაობაზე უნდა იყოს ყველასათვის ხელმისაწვდომი და საჯარო გაცნობის მიზნით უნდა გამოიკრას უნივერსიტეტის საინფორმაციო დაფაზე და განთავსდეს უნივერსიტეტის ვებ-გვერდზე.
3. უნივერსიტეტის რექტორის, ადმინისტრაციის ხელმძღვანელისა და ხარისხის უზრუნველყოფის სამსახურის უფროსის არჩევნებს ნიშნავს უნივერსიტეტის აკადემიური საბჭო.
4. ამ კოდექსით დადგენილი ვადები, მათ შორის, არჩევნების დაწყებიდან მის დასრულებამდე გულისხმობს კალენდარულ დღეებს, საქართველოს შრომის კანონმდებლობით დადგენილი უქმე და დასვენების დღეების ჩათვლით.

თავი IV. უნივერსიტეტის და ფაკულტეტის საარჩევნო კომისიები

მუხლი 13. უნივერსიტეტის საარჩევნო კომისია

1. უნივერსიტეტში არჩევნების ჩატარების მიზნით იქმნება უნივერსიტეტის საარჩევნო კომისია და ფაკულტეტების საარჩევნო კომისიები.
2. უნივერსიტეტის საარჩევნო კომისიის წევრთა რაოდენობა არის კენტი. უნივერსიტეტის კომისია შედგება არანაკლებ 3 და არა უმეტეს 9 წევრისაგან. უნივერსიტეტის საარჩევნო კომისიის შემადგენლობას განსაზღვრავს უნივერსიტეტის აკადემიური საბჭო სიითი შემადგენლობის უმრავლესობით. საარჩევნო კომისიაში შეიყვანება სტუდენტური თვითმმართველობის 1 წარმომადგენელი.
3. უნივერსიტეტის საარჩევნო კომისია უფლებამოსილია:
 - ა) მიიღოს ყველა გადაწყვეტილება არჩევნების საორგანიზაციო საკითხებთან დაკავშირებით, თუ ამ კოდექსით სხვა რამ არ არის გათვალისწინებული;
 - ბ) მიიღოს გადაწყვეტილება ამ კოდექსით გათვალისწინებულ მის კომპენტენციას მიკუთვნებულ სხვა საკითხებზე.
4. უნივერსიტეტის საარჩევნო კომისიას ეკისრება ვალდებულება არჩევნების ამ კოდექსით დადგენილი წესით ჩატარებაზე.
5. უნივერსიტეტის საარჩევნო კომისიის თავმჯდომარე აირჩევა კომისიის პირველ სხდომაზე მისი შემადგენლობიდან კომისიის წევრთა ხმათა უმრავლესობით, ღია კენჭისყრით. უნივერსიტეტის საარჩევნო კომისიის თავმჯდომარე ხელმძღვანელობს კომისიის სხდომებს, ხელს აწერს კომისიის მიერ მიღებულ გადაწყვეტილებებს და ახორციელებს სხვა უფლებამოსილებებს.
6. უნივერსიტეტის საარჩევნო კომისიის მდივნად აირჩევა კომისიის ნებისმიერი წევრი კომისიის პირველივე სხდომაზე, ღია კენჭისყრით, დამსწრეთა უმრავლესობით. კომისიის მდივანი ადგენს კომისიის დღის წესრიგს და სხდომის ოქმებს, რეგისტრაციაში ატარებს საარჩევნო კომისიაში შეტანილ კორესპონდენციას, რეგისტრაციაში ატარებს არჩევნებში მონაწილეობის მსურველ კანდიდატებს და აძლევს მათ შესაბამის მოწმობებს, ადგენს არჩევნების შედეგების შემაჯამებელ ოქმებს და ახორციელებს მისთვის მინიჭებულ სხვა უფლებამოსილებებს.
7. უნივერსიტეტის საარჩევნო კომისია უფლებამოსილია, თუ სხდომას ესწრება წევრთა ნახევარზე მეტი, თუ მას ხმა მისცა დამსწრე წევრთა უმრავლესობამ, თუ სხვა რამ არ არის დადგენილი ამ დებულებით. ხმების თანაბრად გაყოფის შემთხვევაში გადამწყვეტია კომისიის თავმჯდომარის ხმა.
8. უნივერსიტეტის საარჩევნო კომისიის მუშაობის წესი განისაზღვრება რეგლამენტით, რომელსაც ამტკიცებს საარჩევნო კომისია.

მუხლი 14. ფაკულტეტის საარჩევნო კომისია

1. ფაკულტეტის საარჩევნო კომისია იქმნება უნივერსიტეტის საარჩევნო კომისიის გადაწყვეტილებით. ფაკულტეტის საარჩევნო კომისიის წევრთა რაოდენობა არის კენტი. ფაკულტეტის საარჩევნო კომისია შედგება 3 ან 5 წევრისაგან. ფაკულტეტის საარჩევნო კომისიაში შეიყვანება სტუდენტური თვითმმართველობის 1 წარმომადგენელი.
2. ფაკულტეტის საარჩევნო კომისიის წევრებს ნიშნავს უნივერსიტეტის საარჩევნო კომისია.
3. ფაკულტეტის საარჩევნო კომისიის თავმჯდომარე აირჩევა მისი შემადგენლობიდან, ღია კენჭისყრით, ხმათა უმრავლესობით. ფაკულტეტის საარჩევნო კომისიის თავმჯდომარე იღებს გადაწყვეტილებებს მის კომპენტენციას მიკუთვნებულ საკითხებზე.
4. ფაკულტეტის საარჩევნო კომისიის მდივანი უზრუნველყოფს კომისიის საქმისწარმოებას და ახორციელებს მისთვის მინიჭებულ სხვა უფლებამოსილებებს.
5. ფაკულტეტის საარჩევნო კომისია უფლებამოსილია, თუ სხდომას ესწრება წევრთა ნახევარზე მეტი. ფაკულტეტის საარჩევნო კომისიის გადაწყვეტილება მიღებულად ჩაითვლება, თუ მას ხმა მისცა დამსწრე წევრთა უმრავლესობამ, თუ სხვა რამ არ არის დადგენილი ამ კოდექსით. ხმების თანაბრად გაყოფის შემთხვევაში გადამწყვეტია კომისიის თავმჯდომარის ხმა.
6. ფაკულტეტის საარჩევნო კომისიის მუშაობის წესი განისაზღვრება რეგლამენტით, რომელსაც ამტკიცებს უნივერსიტეტის საარჩევნო კომისია.

მუხლი 15. ინტერესთა შეუთავსებლობა

უნივერსიტეტისა და ფაკულტეტის საარჩევნო კომისიის წევრი არ შეიძლება იყოს უნივერსიტეტის ადმინისტრაციული პერსონალის წევრი, აგრეთვე მართვის ორგანოს წევრობის კანდიდატი.

თავი V. წარმომადგენლობითი საბჭოს არჩევის წესი

მუხლი 16. წარმომადგენლობითი საბჭოს შემადგენლობა

1. წარმომადგენლობითი საბჭო აირჩევს 4 წლის ვადით უნივერსიტეტის ძირითადი ერთეულებიდან – ფაკულტეტებიდან, წარმომადგენლობის საფუძველზე სტუდენტებისა და აკადემიური პერსონალის მიერ ცალ–ცალკე, ფაკულტეტებზე მათი რაოდენობის პროპორციულად.
2. წარმომადგენლობითი საბჭოს წევრთა რაოდენობა განისაზღვრება აკადემიური საბჭოს წევრთა ორმაგი ოდენობით.
3. წარმომადგენლობით საბჭოში სტუდენტთა რაოდენობა განისაზღვრება წარმომადგენლობით საბჭოს სრული შემადგენლობის 1/3 –ზე არანაკლები უმცირესი მთელი რიცხვით.
4. წარმომადგენლობითი საბჭოს შემადგენლობაში შედის უნივერსიტეტის ბიბლიოთეკის ხელმძღვანელი.
5. წარმომადგენლობით საბჭოში ფაკულტეტების წარმომადგენლების რაოდენობა პროპორციულია უნივერსიტეტში შესაბამის ფაკულტეტებზე აკადემიური პერსონალისა და სტუდენტების რაოდენობისა და განისაზღვრება რექტორის ადმინისტრაციული აქტით. ამავე აქტით განისაზღვრება თითოეული ფაკულტეტის მიერ წარმომადგენლობით საბჭოში ასარჩევი აკადემიური პერსონალისა და სტუდენტთა რაოდენობები. წარმომადგენლობით საბჭოში ფაკულტეტის წარმომადგენელთა მინიმალური ოდენობა არ შეიძლება იყოს 2–ზე ნაკლები.
6. ფაკულტეტიდან წარმომადგენლობით საბჭოში არჩეულად ითვლება საუკეთესო შედეგების მქონე იმდენი აკადემიური პერსონალისა და სტუდენტთა კანდიდატი, რამდენიც, შესაბამისად, დადგენილია რექტორის ადმინისტრაციული აქტით ამ ფაკულტეტის აკადემიური პერსონალისა და სტუდენტებისათვის.

7. წარმომადგენლობითი საბჭოს შემადგენლობაში არ შეიძლება არჩეულ იყვნენ ადმინისტრაციული და დამხმარე პერსონალის წარმომადგენლები, აგრეთვე აკადემიური საბჭოს წევრები.

მუხლი 17. წარმომადგენლობით საბჭოში ასარჩევ კანდიდატთა რეგისტრაციის წესი.

1. წარმომადგენლობით საბჭოში სტუდენტებს ირჩევს ფაკულტეტის სტუდენტების ამომრჩეველთა სიებში რეგისტრირებული ფაკულტეტის ყველა სტუდენტი, მათ შორის დოქტორანტი.
2. აკადემიური პერსონალის წარმომადგენლებს ირჩევს ფაკულტეტის აკადემიური პერსონალის ამომრჩეველთა სიებში რეგისტრირებული ფაკულტეტის ყველა სრული პროფესორი, ასოცირებული პროფესორი და ასისტენტ-პროფესორი, გარდა დოქტორანტისა.
3. წარმომადგენლობით საბჭოში ასარჩევ კანდიდატთა რეგისტრაციას ახორციელებს უნივერსიტეტის საარჩევნო კომისია. ხოლო ამომრჩეველთა რეგისტრაცია ხორციელდება ფაკულტეტის საარჩევნო კომისიების მიერ უნივერსიტეტის საარჩევნო კომისიის დავალების შესაბამისად.
4. კანდიდატთა რეგისტრაცია მიმდინარეობს 10 დღის განმავლობაში. რეგისტრაციაზე უარის თქმის შემთხვევაში მიეთითება ის ხარვეზი, რომელსაც შეიცავს კანდიდატის მიერ წარმოდგენილი დოკუმენტები. კანდიდატი უფლებამოსილია ხარვეზი გამოასწოროს 2 დღის ვადაში.
5. კანდიდატი უფლებამოსილია რეგისტრაციაზე უარი გაასაჩივროს 1 დღის განმავლობაში. საჩივართან დაკავშირებით გადაწყვეტილებას უნივერსიტეტის საარჩევნო კომისია იღებს 2 დღის განმავლობაში.

მუხლი 18. წარმომადგენლობითი საბჭოს უფლებამოსილების ცნობა და სპიკერის არჩევა.

1. წარმომადგენლობითი საბჭოს პირველ სხდომას იწვევს რექტორი წარმომადგენლობითი საბჭოს არჩევნების საბოლოო შედეგების გამოქვეყნებიდან არაუგვიანეს 5 დღისა.
2. პირველ სხდომას თავმჯდომარეობს წარმომადგენლობითი საბჭოს უხუცესი წევრი. სხდომა უფლებამოსილია, თუ მას ესწრება სრული შემადგენლობის ნახევარზე მეტი.
3. წარმომადგენლობითი საბჭოს ახალარჩეული წევრების უფლებამოსილებას ცნობს საბჭო პირველ სხდომაზე. გადაწყვეტილება მიიღება დამსწრეთა უმრავლესობით.
4. წარმომადგენლობითი საბჭო ფარული კენჭისყრით, საბჭოს სიითი შემადგენლობის უმრავლესობით ირჩევს სპიკერს. კენჭისყრას ატარებს უნივერსიტეტის საარჩევნო კომისია.
5. წარმომადგენლობით საბჭოს სრული შემადგენლობის არანაკლებ 10 პროცენტი, სპიკერის არჩევნებამდე არაუგვიანეს 3 დღისა, უნივერსიტეტის საარჩევნო კომისიას წარუდგენს სპიკერის კანდიდატურას. არჩეულად ჩაითვლება პირი, რომელიც ხმას მისცემს დამსწრე წევრთა უმრავლესობა. იმ შემთხვევაში, თუ პრეტენდენტი ორი ან ორზე მეტია და ვერც ერთმა კანდიდატმა ვერ დააგროვა ხმების საჭირო რაოდენობა, იმავე დღეს უმეტესი ხმების მქონე ორ პრეტენტენტს შორის ტარდება განმეორებითი კენჭისყრა. თუ ამ შემთხვევაშიც ვერ გამოვლინდა გამარჯვებული, არა უგვიანეს 7 დღის განმავლობაში ინიშნება ახალი არჩევნების თარიღი. ახალი არჩევნები ტარდება იმავე წესით. წინა არჩევნებში მონაწილე პრეტენტენტები შემდეგ არჩევნებში მონაწილეობას ვერ მიიღებენ. ახალი არჩევნები ტარდება იმავე წესით.
6. სპიკერს ირჩევს წარმომადგენლობითი საბჭო მის შემადგენლობაში შემავალი აკადემიური პერსონალიდან 4 წლის ვადით.

მუხლი 19. წარმომადგენლობითი საბჭოს წევრების უფლებამოსილების ვადამდე შეწყვეტა.

1. წარმომადგენლობითი საბჭოს წევრის უფლებამოსილების ვადამდე შეწყვეტის საფუძვლებია:
 - ა) პირადი სურვილი;

- ბ) მის მიმართ სასამართლოს მიერ გამოტანილი გამამტყუნებელი განაჩენის კანონიერ ძალაში შესვლა;
 - გ) გარდაცვალება;
 - დ) სასამართლოს მიერ ქმედუუნაროდ ან შეზღუდულქმედუნარიანად აღიარება;
 - ე) უნივერსიტეტის აკადემიური თანამდებობიდან გათავისუფლება ან სტუდენტის სტატუსის შეწყვეტა.
2. დაუშვებელია უფლებამოსილებაშეწყვეტილი აკადემიური პერსონალის წევრის ნაცვლად არჩეულ იქნეს სტუდენტი და პირიქით.
 3. წარმომადგენლობითი საბჭოს წევრის უფლებამოსილების ვადამდე შეწყვეტის შემთხვევაში წარმომადგენლობითი საბჭოს უფლებამოსილების ვადით მისი წევრი ხდება კანდიდატი, რომელმაც შესაბამის არჩევნებში უფლებამოსილებაშეწყვეტილი წევრის შემდეგ ხმების უმეტესი რაოდენობა მოაგროვა. ასეთის არარსებობის შემთხვევაში არჩევნები ტარდება შესაბამისი წარმომადგენლის ასარჩევად უფლებამოსილებაშეწყვეტილი წევრის დარჩენილი ვადით.

თავი VI. აკადემიური საბჭოს არჩევის წესი

მუხლი 20. აკადემიური საბჭოს შემადგენლობა

1. აკადემიური საბჭო აირჩევა 4 წლის ვადით. აკადემიური საბჭოს წევრები აირჩევიან ფაკულტეტების აკადემიური პერსონალის ყველა წევრისა და ფაკულტეტის საბჭოს წევრ სტუდენტური თვითმმართველობის წარმომადგენლების მიერ პირდაპირი, თავისუფალი და თანასწორი არჩევნების საფუძველზე ფარული კენჭისყრით.
2. აკადემიური საბჭოს არჩევნები ჩატარებულად ჩაითვლება, თუ მასში მონაწილეობას მიიღებს ხმის უფლების მქონე პირთა ნახევარზე მეტი, ფაკულტეტების მიხედვით.
3. აკადემიურ საბჭოს წევრთა რაოდენობა განისაზღვრება უნივერსიტეტის წესდებით.
4. კანდიდატთა რეგისტრაცია მიმდინარეობს 10 დღის განმავლობაში. რეგისტრაციაზე უარის თქმის შემთხვევაში მიეთითება ის ხარვეზები, რომელსაც შეიცავს კანდიდატის მიერ წარმოდგენილი დოკუმენტები. კანდიდატი უფლებამოსილია ხარვეზი გამოასწოროს 2 დღის ვადაში.
5. კანდიდატი უფლებამოსილია რეგისტრაციაზე უარი გაასაჩივროს 1 დღის განმავლობაში. საჩივართან დაკავშირებით გადაწყვეტილებას უნივერსიტეტის საარჩევნო კომისია იღებს 2 დღის განმავლობაში.
6. აკადემიური საბჭოს წევრი აირჩევა 4 წლის ვადით, გარდა ამ კოდექსის 21-ე მუხლის მე-2 პუნქტით განსაზღვრული პირებისა.
7. აკადემიური საბჭოს წევრის უფლებამოსილების ვადამდე შეწყვეტის შემთხვევაში აკადემიური საბჭოს წევრის არჩევა ხდება უფლებამოსილებაშეწყვეტილი წევრის დარჩენილი ვადით.
8. ფაკულტეტიდან აკადემიურ საბჭოში არჩეულად ითვლება საუკეთესო შედეგების მქონე იმდენი აკადემიური პერსონალის კანდიდატი, რამდენიც, შესაბამისად დადგენილია უნივერსიტეტის წესდებით ფაკულტეტის აკადემიური პერსონალისათვის.

მუხლი 21. აკადემიური საბჭოს არჩევნების ჩატარება და უფლებამოსილების ცნობა

1. აკადემიური საბჭოს არჩევნებში ხმის მიცემის უფლება აქვს ფაკულტეტის აკადემიური პერსონალის ყველა წევრს და ფაკულტეტის საბჭოს წევრ სტუდენტთა თვითმმართველობის წარმომადგენლებს.
2. აკადემიური საბჭოს პირველ სხდომაზე, რომელიც იმართება არჩევნების საბოლოო შედეგების გამოქვეყნებიდან 3 დღის ვადაში, წილისყრით გამოვლინდება აკადემიური საბჭოს წევრების ერთი მესამედი, რომელთა უფლებამოსილების ვადაა 2 წელი. აკადემიური საბჭო პირველივე სხდომაზე ცნობს თავის უფლებამოსილებას.
3. აკადემიური საბჭოს წევრად აიჩევა სრული ან ასოცირებული პროფესორი.

მუხლი 22. აკადემიური საბჭოს წევრის უფლებამოსილების ვადამდე შეწყვეტა

1. აკადემიური საბჭოს წევრის უფლებამოსილების ვადამდე შეწყვეტის საფუძვლებია:
 - ა) პირადი სურვილი;
 - ბ) უნივერსიტეტის მიერ ქმედუუნაროდ ან სეზღულდულქმედუნარიანად აღიარება;
 - გ) კანონიერ ძალაში შესული სასამართლოს გამამტყუნებელი განაჩენი;
 - დ) სხვა უმაღლეს საგანმანათლებლო დაწესებულებაში აკადემიური ან ადმინისტრაციული თანამდებობის დაკავების შემთხვევა;
 - ე) კანონმდებლობით გათვალისწინებული სხვა შემთხვევა.
2. აკადემიური საბჭოს წევრის უფლებამოსილების ვადამდე შეწყვეტის შემთხვევაში აკადემიური საბჭოს წევრის არჩევა ხდება უფლებამოსილებაშეწყვეტილი წევრის დარჩენილი ვადით.

თავი VII. რექტორის არჩევის წესი

მუხლი 23. რექტორის არჩევნების გამოცხადება

1. უნივერსიტეტის აკადემიური საბჭო აქვეყნებს განცხადებას რექტორის თანამდებობის დასაკავებლად კანდიდატების რეგისტრაციის შესახებ.
2. ამ მუხლის პირველ პუნქტში აღნიშნული განცხადება ქვეყნდება კანდიდატების რეგისტრაციამდე არანაკლებ 1 თვით ადრე.
3. განცხადება უნდა განთავსდეს უნივერსიტეტის ვებ-გვერდზე, გამოქვეყნდეს უნივერსიტეტის ბეჭდვით ორგანოში და განთავსდეს უნივერსიტეტში ყველასათვის თვალსაჩინო ადგილას მისი საჯაროობისა და დაინტერესებულ პირთათვის ხელმისაწვდომობის უზრუნველყოფის მიზნით.
4. განცხადებაში აღინიშნება კანდიდატების რეგისტრაციის დაწყების თარიღი, კანდიდატთა განცხადებების მიღების ბოლო ვადა და რექტორის არჩევნების ჩატარების თარიღი.

მუხლი 24. კანდიდატის რეგისტრაციაში გატარება

1. კანდიდატების რეგისტრაციაში გატარება იწყება 23-ე მუხლით განსაზღვრული განცხადების გამოქვეყნებიდან ერთი თვის შემდეგ.
2. რეგისტრაციაში გატარება ნებისმიერი კანდიდატურა. რექტორობის კანდიდატისათვის დაუშვებელია შეზღუდვის დაწესება რასის, კანის ფერის, ენის, სქესის, რელიგიის, პოლიტიკური და სხვა შეხედულებების, ეროვნული, ეთნიკური და სოციალური კუთვნილების, წარმოშობის, ქონებრივი და წოდებრივი მდგომარეობის, საცხოვრებელი ადგილის, მოქალაქეობისა და დაკავებული აკადემიური თანამდებობის ნიშნით. რექტორის თანამდებობის დასაკავებლად კანდიდატების რეგისტრაციის დაწყების შესახებ განცხადებას უნივერსიტეტის აკადემიური საბჭო აქვეყნებს კანდიდატების რეგისტრაციის დაწყებამდე არანაკლებ 1 თვით ადრე, საქართველოს კანონმდებლობითა და ამ წესდებით დადგენილი წესით, გამჭირვალობის, თანასწორობისა და სამართლიანი კონკურენციის პრინციპების დაცვით. რეგისტრაცია გრძელდება არანაკლებ 2 და არა უმეტეს 3 კვირისა. რექტორის არჩევნები ტარდება კანდიდატების რეგისტრაციის დასრულებიდან არანაკლებ 1 და არა უგვიანეს 2 თვის ვადაში.
3. კანდიდატის რეგისტრაციაში გატარებისათვის სავალდებულოა მის მიერ პირადობის დამადასტურებელი მოწმობის ან პასპორტის ნომრის და სამოქმედო გეგმის წარდგენა. ამ მუხლით გათვალისწინებული კანდიდატების რეგისტრაციას უზრუნველყოფს უნივერსიტეტის საარჩევნო კომისია, რომელიც რეგისტრაციაში ატარებს კანდიდატებს.
4. კანდიდატურის რეგისტრაციაზე უარი უნდა იყოს წერილობითი ფორმით დასაბუთებული.

5. რეგისტრაციაზე უარის შესახებ გადაწყვეტილებაში მიეთითება ის ხარვეზი, რომელსაც შეიცავს კანდიდატის მიერ წარმოდგენილი დოკუმენტები. ხარვეზის გამოსწორება შესაძლებელია 2 დღის ვადაში.
6. კანდიდატი უფლებამოსილია რეგისტრაციაზე უარი გაასაჩივროს 1 დღის განმავლობაში. საჩივართან დაკავშირებით გადაწყვეტილებას უნივერსიტეტის საარჩევნო კომისია იღებს 2 დღის განმავლობაში.

მუხლი 25. უნივერსიტეტის რექტორის არჩევა

1. კანდიდატების რეგისტრაციის დასრულებიდან არანაკლებ 1 და არაუგვიანეს 2 თვის ვადაში იმართება უნივერსიტეტის რექტორის არჩევნები.
2. კანდიდატი აკადემიურ საბჭოს საჯაროდ წარუდგენს სამოქმედო გეგმას.
3. რექტორი აირჩევა უნივერსიტეტის აკადემიური საბჭოს მიერ ფარული კენჭისყრით სიითი შემადგენლობის უმრავლესობით.
4. რექტორი აირჩევა 4 წლის ვადით.

თავი VIII. ადმინისტრაციის ხელმძღვანელის არჩევის წესი

მუხლი 26. ადმინისტრაციის ხელმძღვანელის კანდიდატურის შერჩევა

1. აკადემიური საბჭო აქვეყნებს განცხადებას ადმინისტრაციის ხელმძღვანელის კანდიდატურების შერჩევის შესახებ. ადმინისტრაციის ხელმძღვანელის უფლებამოსილების შეწყვეტის შემთხვევაში აკადემიური საბჭო ერთი თვის ვადაში წარმომადგენლობით საბჭოს სიითი შემადგენლობის უმრავლესობით წარუდგენს ადმინისტრაციის ხელმძღვანელის კანდიდატურას.
2. განცხადებაში აღინიშნება კანდიდატთა რეგისტრაციის დაწყების თარიღი, კანდიდატთა განცხადებების მიღების ბოლო ვადა, კანდიდატების მიერ წარმოსადგენ დოკუმენტთა ნუსხა და არჩევნების ჩატარების თარიღი, ასევე კრიტერიუმები, რომლებსაც უნდა აკმაყოფილებდეს კანდიდატურა. კრიტერიუმები და წარსადგენი დოკუმენტების ნუსხა განისაზღვრება აკადემიური საბჭოს აქტით.
3. კანდიდატების რეგისტრაცია მიმდინარეობს 20 დღის ვადაში. რეგისტრაციაზე უარის თქმის შემთხვევაში გადაწყვეტილებაში მიეთითება, თუ რა ხარვეზს შეიცავს კანდიდატის მიერ წარმოდგენილი დოკუმენტები. კანდიდატი უფლებამოსილია 2 დღის ვადაში გამოასწოროს ხარვეზი.
4. არჩევნების ჩატარების დღეს, აკადემიური საბჭოს სხდომაზე კანდიდატები საბჭოს წევრებს აცნობენ სამოქმედო პროგრამებს. საბჭო ფარული კენჭისყრით, სიითი შემადგენლობის უმრავლესობით, შერჩეულ კანდიდატურას წარუდგენს წარმომადგენლობით საბჭოს.

მუხლი 27. ადმინისტრაციის ხელმძღვანელის დამტკიცება წარმომადგენლობითი საბჭოს მიერ.

1. წარმომადგენლობითი საბჭო აკადემიური საბჭოს მიერ კანდიდატურის წარდგენიდან 10 დღის ვადაში ფარული კენჭისყრით ამტკიცებს ადმინისტრაციის ხელმძღვანელს სიით შემადგენლობის უმრავლესობით.
2. ხმის მიცემის პროცედურის ჩატარებას და შედეგების შეჯამებას ამ კოდექსის შესაბამისად უზრუნველყოფს უნივერსიტეტის საარჩევნო კომისია. კომისია საჯაროდ აცხადებს არჩევნების ჩატარების დღეს.
3. წარმომადგენლობითი საბჭოს მიერ კანდიდატურის დაუმტკიცებლობის შემთხვევაში აკადემიური საბჭო უფლებამოსილია ერთი კვირის ვადაში წარმომადგენლობით საბჭოს წარუდგინოს ახალი ან იგივე კანდიდატურა.
4. კანდიდატურის ხელმეორედ დაუმტკიცებლობის შემთხვევაში აკადემიური საბჭო ატარებს ამ თავით გათვალისწინებულ შერჩევის პროცედურას და კონკურსის საფუძველზე შერჩეულ ახალ კანდიდატურას წარუდგენს წარმომადგენლობით საბჭოს.
5. ადმინისტრაციის ხელმძღვანელობის უფლებამოსილების ვადაა ოთხი წელი.

თავი IX. უნივერსიტეტის ხარისხის უზრუნველყოფის სამსახურის ხელმძღვანელის არჩევის წესი

მუხლი 28. უნივერსიტეტის ხარისხის უზრუნველყოფის სამსახურის ხელმძღვანელის არჩევა.

1. აკადემიური საბჭო აცხადებს კონკურსს უნივერსიტეტის ხარისხის უზრუნველყოფის სამსახურის ხელმძღვანელის შესარჩევად.
2. განცხადება უნივერსიტეტის ხარისხის უზრუნველყოფის სამსახურის ხელმძღვანელის შესარჩევად კონკურსის გამოცხადების შესახებ უნდა შეიცავდეს იმ კრიტერიუმებსა და წარსადგენ დოკუმენტთა ნუსხას, რასაც უნდა აკმაყოფილებდეს კანდიდატი. კრიტერიუმებსა და წარსადგენ დოკუმენტთა ნუსხას ამტკიცებს აკადემიური საბჭო შესაბამისი აქტით. ხარისხის უზრუნველყოფის სამსახურის უფროსი შეიძლება იყოს სრული ან ასოცირებული პროფესორი. განცხადების გამოქვეყნებიდან 15 დღის განმავლობაში მიმდინარეობს კანდიდატების რეგისტრაცია. რეგისტრაციაზე უარის შესახებ გადაწყვეტილებაში მიეთითება, თუ რა ხარვეზს შეიცავს კანდიდატის მიერ წარმოდგენილი დოკუმენტები. ხარვეზის გამოსწორება შესაძლებელია 2 დღის ვადაში.
3. განცხადებების მიღების ვადის დასრულებიდან 10 დღის ვადაში აკადემიური საბჭო შეარჩევს კანდიდატურას და დასამტკიცებლად წარუდგენს წარმომადგენლობით საბჭოს.
4. წარმომადგენლობითი საბჭო უნივერსიტეტის ხარისხის უზრუნველყოფის სამსახურის ხელმძღვანელის კანდიდატურის წარდგენიდან 5 დღის ვადაში სიით შემადგენლობის უმრავლესობით ამტკიცებს კანდიდატურას ან დასაბუთებულ უარს აცხადებს მის დამტკიცებაზე.
5. წარმომადგენლობითი საბჭოს მიერ უნივერსიტეტის ხარისხის უზრუნველყოფის სამსახურის უფროსის კანდიდატურის დაუმტკიცებლობის შემთხვევაში აკადემიური საბჭო აცხადებს ხელახალ კონკურსს და ახალ შერჩეულ კანდიდატურას წარუდგენს წარმომადგენლობით საბჭოს, რომელიც არ შეიძლება იყოს წარმომადგენლობითი საბჭოს მიერ დაუმტკიცებელი კანდიდატი.
6. კანდიდატურის შერჩევის განმეორებით კონკურსის გამოცხადებისას გამოიყენება ამ თავით დადგენილი ვადები.
7. უნივერსიტეტის ხარისხის უზრუნველყოფის სამსახურის ხელმძღვანელის კანდიდატურების განცხადებების რეგისტრაციას და კონკურსის წესით აკადემიური საბჭოს მიერ მისი შერჩევის ფარულობას უზრუნველყოს უნივერსიტეტის საარჩევნო კომისია.
8. უნივერსიტეტის ხარისხის მართვის სამსახურის უფროსის უფლებამოსილების ვადამდე შეწყვეტის შემთხვევაში ტარდება ამ თავით გათვალისწინებული პროცედურა.

თავი X. არჩევნების ორგანიზების და ჩატარების წესი.

მუხლი 29. წინასაარჩევნო აგიტაცია და კამპანია.

1. უნივერსიტეტის მართვის ორგანოში ასარჩევ კანდიდატს უფლება აქვს ჩაატაროს წინასაარჩევნო კამპანია. წინასაარჩევნო კამპანიის წარმართვისას ყველა კანდიდატი სარგებლობს თანასწორი უფლებით.
2. მართვის ორგანოში ასარჩევ კანდიდატებს, ფაკულტეტის ამომრჩევლებს უფლება აქვს გასწიონ წინასაარჩევნო აგიტაცია კანდიდატის მხარდასაჭერად.
3. არჩევნების დღეს იკრძალება საარჩევნო კამპანიისა და აგიტაციის წარმოება.
4. წინასაარჩევნო კამპანიასა და აგიტაციაში მონაწილეობის მიღების უფლება არ აქვთ:

- ა) საარჩევნო კომისიის წევრებს;
 - ბ) ადმინისტრაციულ პერსონალს, თუ სხვა რამ არ არის დადგენილი ამ დებულებით.
5. წინასაარჩევნო კამპანია და აგიტაცია შესაძლებელია განხორციელდეს სხვადასხვა ღონისძიებების ჩატარებით (კრებები და შეხვედრები ამომრჩევლებთან, საჯარო დებატები და დისკუსიები). ბეჭდური სააგიტაციო მასალების გამოცემა-გავრცელებით, წინასაარჩევნო მოწოდებების, განცხადებების, ფურცლებისა და ფოტომასალის დამზადებისა და გავრცელების გზით, აგრეთვე, კანონმდებლობით ნებადართული ნებისმიერი სხვა საშუალებით. აკრძალულია მათი გავრცელებისათვის ხელის შეშლა.
 6. წინასაარჩევნო კამპანიამ და აგიტაციამ არ უნდა შეუშალოს ხელი უნივერსიტეტში სასწავლო პროცესს. იკრძალება მეცადინეობებზე სტუდენტებთან საარჩევნო კამპანიისა და აგიტაციის ჩატარება, აგრეთვე ნებისმიერი ისეთი ქმედება, რაც შეუფერებელია ასარჩევი კანდიდატის სტატუსთან (პირდაპირი ან არაპირდაპირი გზით მოსყიდვა, ან რაიმე სიკეთის ან პრივილეგიის მინიჭება, ან ასეთის დაპირება და სხვა), ხელყოფს წესრიგს უნივერსიტეტში ან ზიანს აყენებს უნივერსიტეტის ქონებას.
 7. უნივერსიტეტის ადმინისტრაციულ პერსონალს უფლება არ აქვს დაუსაბუთებელი უარი უთხრას წინასაარჩევნო კამპანიისა და აგიტაციისათვის აუდიტორიებით და დარბაზებით სარგებლობისათვის. ყველა კანდიდატისათვის უნივერსიტეტის ფართით სარგებლობა უნდა იყოს თანაბრად ხელმისაწვდომი.
 8. ამ მუხლის მე-7 პუნქტით გათვალისწინებული უარი არის წერილობითი ფორმის და მისი მიღებიდან ორი დღის ვადაში საჩივრდება უნივერსიტეტის საარჩევნო კომისიაში, რომელიც გადაწყვეტილებას იღებს 1 დღის ვადაში.

მუხლი 30. საარჩევნო სიები.

1. საარჩევნო სიებს ადგენს უნივერსიტეტის შესაბამისი ფაკულტეტის დეკანი უნივერსიტეტის შესაბამის სტრუქტურულ ერთეულთან შეთანხმებით.
2. აკადემიური პერსონალისა და სტუდენტთათვის დგება ერთიანი საარჩევნო სიები.
3. უნივერსიტეტის სტუდენტთა ამომრჩეველთა სიებში შეიტანება უნივერსიტეტის საარჩევნო კომისიის მიერ დადგენილი წესით ამ დებულების შესაბამისად.
4. უნივერსიტეტის აკადემიური პერსონალის ამომრჩეველთა სიებში შეიტანება მოცემული ფაკულტეტის ყველა პროფესორი, ასოცირებული პროფესორი და ასისტენტ-პროფესორი, გარდა დოქტორანტისა.
5. იმ შემთხვევაში, თუ აკადემიური პერსონალის წევრი დასაქმებულია ერთზე მეტ ფაკულტეტზე, იგი შეიტანება იმ ფაკულტეტის საარჩევნო სიაში, რომელზეც მას აქვს მეტი საათობრივი დატვირთვა. თუ აკადემიური პერსონალის წევრის საათობრივი დატვირთვა თანაბარია რამდენიმე ფაკულტეტზე, იგი თავად განსაზღვრავს, რომელი ფაკულტეტის აკადემიური პერსონალის საარჩევნო სიაში იქნეს შეტანილი.
6. ფაკულტეტის საარჩევნო სიაში შეიტანება შემდეგი მონაცემები:
 - ა) ამომრჩევლის სახელი და გვარი;
 - ბ) სტუდენტის ბილეთის ნომერი – სტუდენტი ამომრჩევლისათვის; დოქტორანტის სტატუსის დამადასტურებელი ცნობა – დოქტორანტისათვის;
 - გ) აკადემიური პერსონალის არჩევა/დანაშენის შესახებ გადაწყვეტილების/დადგენილების ან შრომითი ხელშეკრულების ნომერი, ან პირადობის დამადასტურებელი მოწმობის ნომერი – აკადემიური პერსონალისათვის.
7. დაუშვებელია ერთსა და იმავე პირის მონაცემების რამდენიმე ფაკულტეტის საარჩევნო სიაში ან იმავე ფაკულტეტის საარჩევნო სიაში შეტანა.

მუხლი 31. საარჩევნო ბიულეტენი.

1. ამომრჩევლის მიერ ხმის მიცემა ხორციელდება საარჩევნო ბიულეტენზე სათანადო აღნიშვნით და საარჩევნო ბიულეტენის საარჩევნო ყუთში მოთავსებით.
2. საარჩევნო ბიულეტენები იბეჭდება უნივერსიტეტის მიერ, რომელზედაც პასუხისმგებელია უნივერსიტეტის საარჩევნო კომისია.
3. საარჩევნო ბიულეტენზე აღინიშნება:
 - ა) უნივერსიტეტისა და შესაბამისი ფაკულტეტის სახელწოდება;
 - ბ) აღნიშვნა იმის შესახებ, თუ რომელი მართვის ორგანოს არჩევნებისთვის არის განკუთვნილი;
 - გ) ასარჩევი კანდიდატების ჩამონათვალი.
4. წარმომადგენლობითი საბჭოს ასარჩევად დაუშვებელია პირზე ერთზე მეტი საარჩევნო ბიულეტენის გაცემა
5. საარჩევნო ბიულეტენი გაიცემა პირზე პირადობის დამადასტურებელი მოწმობის ან სტუდენტის სტატუსის დამადასტურებელი მოწმობის წარმოდგენის შემთხვევაში.

მუხლი 32. საარჩევნო ყუთი.

1. უნივერსიტეტი არჩევნების ჩასატარებლად უზრუნველყოფს საარჩევნო ყუთებით საარჩევნო კომისიების აღჭურვას. თითოეული საარჩევნო კომისიას გადაეცემა საარჩევნო ყუთი.
2. საარჩევნო ყუთზე თვალსაჩინო ფორმით აღინიშნება, თუ რომელი მართვის ორგანოს არჩევნებისთვისაა განკუთვნილი.
3. საარჩევნო ყუთი კენჭისყრამდე მოწმდება, რათა საარჩევნო კომისიის წევრები და დამკვირვებლები დარწმუნდნენ, რომ იგი ცარიელია. კენჭისყრის დაწყებამდე საარჩევნო ყუთი ილუქება კომისიის წევრებისა და დამკვირვებლების თანდასწრებით და პირველი ამომრჩევლის საარჩევნო ბიულეტენთა ერთად მასში მოთავსდება საკონტროლო ფურცელი, რაც არჩევნების შედეგების ნამდვილობის შემოწმების ერთ-ერთი საშუალებაა.
4. საკონტროლო ფურცელი დგება 2 ეგზემპლარად და მათზე აღინიშნება შესაბამისი ფაკულტეტისა და პირველი ამომრჩევლის რეკვიზიტები, კომისიის ყველა წევრის ხელმოწერა. საკონტროლო ფურცლის 1 ეგზემპლარი რჩება საარჩევნო კომისიაში.
5. თუ საარჩევნო ყუთი დაზიანდა არჩევნების პროცესში, საარჩევნო კომისია უფლებამოსილია იმსჯელოს არჩევნების შედეგების ბათილად ცნობის შესახებ, თუ მიიჩნევს, რომ ამან შეიძლება გავლენა იქონიოს არჩევნების შედეგებზე.
6. თუ საარჩევნო ყუთში გახსნის შემდეგ არ აღმოჩნდა საკონტროლო ფურცელი, ან მასში მოთავსებული საკონტროლო ფურცლი მონაცემები არ დაემთხვა საარჩევნო კომისიაში არსებულ საკონტროლო ფურცლის მონაცემებს, არჩევნების შედეგები ცხადდება ბათილად.

მუხლი 33. არჩევნების ორგანიზება.

1. აკადემიური და წარმომადგენლობითი საბჭოს არჩევნები ტარდება რექტორის მიერ დანიშნულ დღეს, ხოლო რექტორის, ადმინისტრაციის ხელმძღვანელისა და ხარისხის უზრუნველყოფის სამსახურის უფროსის არჩევნები აკადემიური საბჭოს მიერ განსაზღვრულ დღეს.
2. არჩევნების ორგანიზებასა და ჩატარებასთან დაკავშირებულ ხარჯებს ფარავს უნივერსიტეტი. უნივერსიტეტი არ ანაზღაურებს კანდიდატების მიერ გაწეულ ხარჯებს.
3. უნივერსიტეტი უზრუნველყოფს საარჩევნო კომისიისათვის შესაბამისი ოთახის გამოყოფას.
4. უნივერსიტეტის და ფაკულტეტის საარჩევნო კომისიები მუშაობას იწყებენ არჩევნების დღეს დილის 9 საათზე. კენჭისყრა იწყება არჩევნების დღეს დილის 10 საათზე.
5. ფაკულტეტის საარჩევნო კომისიის წევრები არჩევნების დღეს დილის 10 საათამდე წილისყრით ინაწილებენ ფუნქციებს. წილისყრის შედეგად გამოვლენილ უნდა იქნეს:
 - ა) რეგისტრატორი;

- ბ) საარჩევნო ბიულეტენზე ხელმომწერი;
 - გ) ამომრჩეველთა ნაკადის მარეგულირებელი.
6. ფაკულტეტის საარჩევნო კომისიის თავმჯდომარე არ იღებს მონაწილეობას წილისყრაში.

მუხლი 34. არჩევნების პროცედურა.

1. კენჭისყრის დღეს ფაკულტეტის ამომრჩეველი საარჩევნო კომისიის რეგისტრატორისაგან იღებს შესაბამის საარჩევნო ბიულეტენს, რასაც ადასტურებს ამომრჩეველთა სიაში მისი გვარის გასწვრივ ხელმოწერით. ამის შემდეგ ამომრჩეველი მიდის ხელმომწერ კომისიის წევრთან, რომელიც საარჩევნო ბიულეტენის შესაბამის გრაფაში აწერს ხელს. შემდეგ ამომრჩეველი შედის სპეციალურად მოწყობილ საარჩევნო კაბინაში, მას შემდეგ, რაც წრიულად შემოხაზავს მისთვის სასურველ ერთ კანდიდატურას, აგდებს საარჩევნო ბიულეტენს საარჩევნო ყუთში და გადის საარჩევნო კომისიის ოთახიდან. დაუშვებელია ოთახში ხუთზე მეტი ამომრჩევლის ერთდროულად ყოფნა.
2. კაბინად შეიძლება ჩაითვალოს აგრეთვე ნებისმიერი განცალკავებული ადგილი, სადაც ხმის მიცემის ფარულობა დაცული იქნება.

მუხლი 35. არჩევნების შედეგების შეჯამება.

1. კენჭისყრა მთავრდება არჩევნების დღეს 17 საათზე.
2. კენჭისყრის დასრულების შემდეგ საარჩევნო კომისიის წევრები ითვლიან საარჩევნო სიებში ხელმოწერების მიხედვით არჩევნებზე გამოცხადებულ ამომრჩეველთა რაოდენობას, რაც ფიქსირდება შესაბამის შემაჯამებელ ოქმში, რომელშიც აისახება არჩევნებში მონაწილე ყველა კანდიდატის მიერ მიღებული ხმების რაოდენობა.
3. არჩევნები ჩატარებულად ითვლება, თუ გამოცხადდა ამომრჩეველთა სიებში შეტანილ ამომრჩეველთა 1/3 მაინც. წარმომადგენლობითი საბჭოს არჩევნები ჩატარებულად ითვლება, თუ არჩევნებში მონაწილეობას მიიღებს ხმის უფლების მქონე აკადემიური პერსონალის არანაკლებ 1/3-ი, ხოლო სტუდენტთა 5 პროცენტი მაინც, ფაკულტეტების მიხედვით, ცალ-ცალკე სტუდენტებისა და აკადემიური პერსონალის რაოდენობიდან.
4. არჩევნებზე გამოცხადებულ ამომრჩეველთა რაოდენობის დათვლის შემდეგ იხსნება საარჩევნო ყუთი და კომისიის წევრები ითვლიან საარჩევნო ბიულეტენებს.
5. საარჩევნო ყუთიდან ამოღებული და წრიულად შემოხაზული საარჩევნო ბიულეტენები ლაგდება ცალ-ცალკე, არჩევნებში მონაწილე კანდიდატურების მიხედვით. ცალკე ლაგდება ბათილი საარჩევნო ბიულეტენები.
6. საარჩევნო ბიულეტენი ბათილია, თუ:
 - ა) არ აღმოჩნდა საარჩევნო ბიულეტენზე ხელმომწერი კომისიის წევრის ხელმოწერა;
 - ბ) თუ არ არის შემოხაზული არც ერთი კანდიდატურა;
 - გ) თუ შემოხაზულია ერთზე მეტი კანდიდატურა;
 - დ) თუ შეუძლებელია გაირკვეს, რომელ კანდიდატს მისცა ხმა ამომრჩეველმა.
 - ე) მასზე არ არის მითითებული იმ ფაკულტეტის სახელწოდება, რომელზეც ტარდება არჩევნები.
7. ხმების დათვლისთანავე ივსება შემაჯამებელი ოქმი, რომელშიც შეიტანება შემდეგი მონაცემები:
 - ა) ფაკულტეტის ამომრჩეველთა რაოდენობა სიების მიხედვით;
 - ბ) არჩევნებზე გამოცხადებულ ამომრჩეველთა რაოდენობა საარჩევნო სიებში ამომრჩეველთა ხელმოწერების მიხედვით;
 - გ) საარჩევნო ყუთში აღმოჩენილი საარჩევნო ბიულეტენების საერთო რაოდენობა;
 - დ) ბათილი საარჩევნო ბიულეტენების რაოდენობა;
 - ე) თითოეული კანდიდატის მიერ მოპოვებული ხმების რაოდენობა;
 - ვ) კომისიის ყველა წევრის ხელმოწერა.

მუხლი 36. დამკვირვებელი.

1. უნივერსიტეტში არჩევნების პროცესზე დაკვირვების მიზნით ფიზიკური და იურიდიული პირები უფლებამოსილნი არიან არჩევნების დღემდე არა უგვიანეს 5 დღით ადრე მიმართონ უნივერსიტეტის საარჩევნო კომისიას დამკვირვებლის სტატუსის მოსაპოვებლად.
2. იურიდიული პირი არჩევნებში დამკვირვებლის სტატუსს განახორციელებს მისი წარმომადგენლობის მეშვეობით, რომელთა ვინაობა მიეთითება დამკვირვებლის სტატუსის მოსაპოვებლად წარდგენილ განცხადებაში.
3. პირი არ დაიშვება დამკვირვებლად, თუ იგი არის:
 - ა) უნივერსიტეტის მართვის ორგანოში ასარჩევი კანდიდატი;
 - ბ) ადმინისტრაციული პერსონალის წევრი;
 - გ) იმ ფაკულტეტის ამომრჩეველი, სადაც ითხოვს დამკვირვებლად მონაწილეობას.
4. დამკვირვებელი უფლებამოსილია დაესწროს საარჩევნო კომისიების მუშაობას არჩევნების დღეს და საჩივრების განხილვის პროცესში.
5. დამკვირვებელი უფლებამოსილია:
 - ა) დარღვევის აღმოჩენის შემთხვევაში მიუთითოს თავმჯდომარეს და მოითხოვოს დარღვევის აღკვეთა;
 - ბ) კომისიის თავმჯდომარის მიერ ამ პუნქტის „ა“ ქვეპუნქტით გათვალისწინებული მოთხოვნის შეუსრულებლობის შემთხვევაში შეადგინოს დარღვევის ოქმი;
 - გ) წარადგინოს საჩივარი უნივერსიტეტის საარჩევნო კომისიაში.
6. დამკვირვებელი ვალდებულია ხელი არ შეუშალოს არჩევნების ჩატარებას.
7. საარჩევნო კომისიები ვალდებულნი არიან ხელი აე შეუშალონ დამკვირვებელს.

მუხლი 37. დარღვევის ოქმი.

1. არჩევნების დღეს ამ დებულებით დადგენილი წესის დარღვევის გამოვლენის შემთხვევაში კანდიდატი, დამკვირვებელი, საარჩევნო კომისიის წევრი ან შესაბამისი ფაკულტეტის ამომრჩეველი უფლებამოსილია შეადგინოს დარღვევის ოქმი, რომელშიც მიეთითება:
 - ა) ოქმის შემდგენი პირის სახელი, გვარი, მისამართი.
 - ბ) ოქმის შემდგენი პირის სტატუსი (კანდიდატი, ამომრჩეველი, დამკვირვებელი, საარჩევნო კომისიის წევრი);
 - გ) დარღვევის შინაარსი;
 - დ) დარღვევის დაფიქსირების დრო;
 - ე) საარჩევნო კომისიის თავმჯდომარის ხელმოწერა, ან აღნიშვნა მის მიერ ხელმოწერაზე უარის შესახებ;
 - ვ) მოწმეების ვინაობა (იმ შემთხვევაში, თუ არსებობენ მოწმეები, რომლებიც დაადასტურებენ ამ ფაქტობრივ გარემოებას) და მათი ხელმოწერები;
 - ზ) ოქმის შემდგენი პირის მოთხოვნა;
 - თ) ოქმის შემდგენი პირის ხელმოწერა.

მუხლი 38. არჩევნების შედეგების გამოცხადება

არჩევნების შედეგები ცხადდება არჩევნების დღეს. ფაკულტეტის საარჩევნო კომისია ვალდებულია ყველასათვის ხელმისაწვდომ ადგილას გამოაკრას არჩევნების შედეგების აქტი.

თავი XI. არჩევნების პროცედურისა და შედეგების გასაჩივრების წესი

თავი 39. მართვის ორგანოების ამომრჩეველთა და კანდიდატთა რეგისტრაციის წესი.

1. ამომრჩეველთა და კანდიდატთა რეგისტრაციას ახორციელებს უნივერსიტეტის საარჩევნო კომისია, რომელიც უფლებამოსილია ფაკულტეტის საარჩევნო კომისიას დააკისროს რეგისტრაციის ორგანიზაციის უზრუნველყოფა.
2. თუ ამ კოდექსით სხვა რამ არ არის დადგენილი, მართვის ორგანოების ამომრჩეველთა და კანდიდატთა რეგისტრაცია მიმდინარეობს 10 დღის განმავლობაში. ამომრჩევლის/კანდიდატის რეგისტრაციაზე უარის თქმის შემთხვევაში,

უნივერსიტეტის საარჩევნო კომისია ვალდებულია მიუთითოს, თუ რა ხარვეზს შეიცავს წარმოდგენილი დოკუმენტაცია. კანდიდატი/ამომრჩეველი უფლებამოსილია ხარვეზი შეავსოს 2 დღის განმავლობაში. უნივერსიტეტის საარჩევნო კომისიის უარი რეგისტრაციაზე კანდიდატის მიერ შეიძლება გასაჩივრდეს გადაწყვეტილების მიღებიდან 1 დღის განმავლობაში.

3. საჩივართან დაკავშირებულ გადაწყვეტილებას უნივერსიტეტის საარჩევნო კომისია იღებს 3 დღის ვადაში.

მუხლი 40. არჩევნების შედეგების გასაჩივრება

1. თუ ამ დებულებით სხვა რამ არ არის დადგენილი, არჩევნების შედეგების გამოცხადებიდან 24 საათის განმავლობაში კანდიდატს, დამკვირვებელს, ფაკულტეტის საარჩევნო კომისიის წევრს ან შესაბამისი ფაკულტეტის ამომრჩეველს უფლება აქვს შეიტანოს საჩივარი ამ დებულებით განსაზღვრული წესის დარღვევასთან დაკავშირებით უნივერსიტეტის საარჩევნო კომისიაში. ამ ვადის გასვლის შემდეგ საჩივრები არ მიიღება.
2. საჩივარი უნდა შეიცავდეს შემდეგ რეკვიზიტებს:
 - ა) საჩივრის შემტანი პირის სახელი, გვარი, მისამართი.
 - ბ) საჩივრის შემტანი პირის სტატუსი (კანდიდატი, ამომრჩეველი, დამკვირვებელი, ფაკულტეტის საარჩევნო კომისიის წევრი);
 - გ) დარღვევის შინაარსი;
 - დ) მოწმეების ვინაობა (იმ შემთხვევაში, თუ არსებობენ მოწმეები, რომლებიც დაადასტურებენ ამ ფაქტობრივ გარემოებას);
 - ე) საჩივრის შემომტანი პირის მოთხოვნა;
 - ვ) საჩივრის შემომტანი პირის ხელმოწერა.
3. საჩივარს თან ერთვის დარღვევის ოქმის ასლი, ასეთის არსებობის შემთხვევაში.
4. უნივერსიტეტის საარჩევნო კომისია ვალდებულია საჩივრის შეტანიდან 3 დღის განმავლობაში განიხილოს საჩივრები და მიიღოს სათანადო გადაწყვეტილება.
5. არჩევნების ბათილად ცნობის შესახებ გადაწყვეტილებას უნივერსიტეტის საარჩევნო კომისია იღებს იმ შემთხვევაში, თუ მიიჩნევს, რომ ამ ბრძანებით დადგენილი წესის ან/და ფაკულტეტის საარჩევნო კომისიის მიერ საარჩევნო ბიულეტენების დათვლის პროცესში გამოვლენილმა დარღვევამ არსებითი გავლენა იქონია არჩევნების შედეგზე.

მუხლი 41. საბოლოო შედეგების გამოქვეყნება.

1. არჩევნების საბოლოო შედეგებს აქვეყნებს უნივერსიტეტის საარჩევნო კომისია ყველასათვის ხელმისაწვდომ ადგილზე ღიად განთავსებით. არჩევნების შედეგები ქვეყნდება უნივერსიტეტის ვებ-გვერდზე, უნივერსიტეტის ბეჭდით ორგანოში და გამოიკრება უნივერსიტეტის საინფორმაციო დაფაზე.
2. არჩევნების საბოლოო შედეგები ძალაში შედის გამოქვეყნებისთანავე.